

NÜXĨRAÜXŨ GA POPERA GA

PEDRU ÜMATÜXŨ

**Pedru nüxũ narũmoxẽ ga jema jaxõgũxũ
ga to ga nachĩũãnegu woonexũ**

1 ¹Pa Chaueneẽgũx, chama i Pedru nixĩ i pexçax chanaxũmatũxũ i nhaã popera. Rũ chama nixĩ i Ngechuchu ja Cristu choxũ muxũ na duũxũgũmaã nüxũ chixuxũçax i norũ ore. Rũ pexçax chanaxũmatũ i pema na perũ naãnena to i nachĩũãnegũgu penawoonexũ i Põtuanewa rũ Gárataanewa rũ Capadochíaanewa rũ Áchiaanewa rũ Bitiniãanewa ngẽxmagũxe. ²Rũ pexũ nixĩ ga jadexechixũ ga Tanatũ ja Tupana, jerũ woetama jema nixĩ ga nuxcũmaxũchima nagu naxĩnũxũ. Rũ nanamu ga Naãẽ i Üünexũ na pexũ jamexẽẽgũxũçax na aixcuma napexewa peixũũnegũxũçax rũ Ngechuchu ja Cristuga na pexĩnũẽxũçax rũ nagũmaã na pejauxgũxũçax na nataxuxũçax i perũ chixexũgũ. Rũ chanaxwaxe i Tanatũ ja Tupana poraãcũ pexũ narĩngũxẽẽ rũ pexũ nataãexẽẽ.

Ítanangũxẽẽ na wena tá imaxẽxũ

³Rũ ngĩxã nüxũ ticuaxũũgũ ja Tupana ja tórũ Cori ja Ngechuchu ja

Cristu Nanatũ! Jerũ jexguma Ngechuchu ja Cristuxũ wena namaxẽẽgu, rũ tũxna nanaxã ga maxũ ga jexwacaxũxũ, jerũ poraãcũ nüxũ tangechaũtũmũũgũ. Rũ ngẽmacax i nhũxma i jixema rũ ta ítanangũxẽẽ na wena tá imaxẽxũ. ⁴Rũ pema rũ wũxi i ngunexũgu rũ aixcuma tá penajauxgũ i guxũma i ngẽma mexũgũ i Tupana tá pexna ãxũ i nhũxma dauxũguxũ i naãnegu pexũ namaã nanguxũxũ. Rũ ngẽma tá pexna naxãxũ rũ tagutãma inajarũxo, rũ tagutãma naxãũãchi, rũ tagutãma nangau. ⁵Rũ nhũxma na Tupanaãxũ pejaxõgũxũ rũ nüma rũ norũ poramaã tá pexna nadau nhũxmatãta aixcuma penajauxgũ i ngẽma maxũ i taguma gũxũ i tá pexna naxãxũ i ngẽxguma naguxgu i naãne. ⁶Rũ ngẽmacax name nixĩ i poraãcũ petaãẽgũ, rũ nüetama nixĩ ega woo nhũxma nhaã perũ maxũwa rũ paxaxãchi muxũma i guxchaxũgũ pexũ üpetũgu. ⁷Ertũ ngẽmaãcũ nixĩ i pexũ naxũxũ ja Tupana na nüxũ nacuãxũçax rũ ngoxi aixcuma pejaxõgũ rũ exna tama. Rũ ngẽxguma pejaxõgũamagu ega woo guxchaxũgũ

peççax ínguxgu, rü ngêma perü õ rü wüxi i uiruarü jexera nixí na namexü erü ngêma uiru rü woo namexêchi notürü düxwa nangau. Rü ngêma uiru rü üxümaã nüxü taxü na nüxü icuáxüçax rü ngoxi aixcuma uiruxüchi jîixü. Rü ngêxgumarüü ta nixí i perü õ na guxchaxügümaã Tupana nüxü üxü na nüxü nacuáxüçax rü ngoxi aixcuma nüxü pejaxögü na jixcama pexü jacuaxüüxüçax rü mexü i pechica pexna naxãxüçax rü pemaã nataãxüçax i ngêxguma wena núma naxüxgu ja Ngechuchu ja Cristu. ⁸⁻⁹Pema rü Ngechuchu ja Cristuxü pengechaügü woo taguma nüxü na pedaugüxü. Rü nhuxma rü ta woo tama nüxü pedaugü, notürü nüxü pejaxögü, rü poraãcü petaãægü. Rü ngêma perü taãemaã rü taxuacüma nüxü peixuéga na nhuxãcü petaãægüxüchixü, erü marü penajauxgü i perü maxü i taguma gúxü. Rü ngêmacax nixí i nüxü pejaxögüxü. ¹⁰Rü nuxcümáxüchima ga Tupanaärü orearü uruügü, rü nüxü nixugüe ga na nhuxãcü tá Tupana pexü narüngüxêxü. Rü nümágu rü poraãcü nangúe rü naxçax nadaugü i ngêma maxü i taguma gúxü. ¹¹Rü nümágu ga jema orearü uruügü rü Tupanaärü poperawa nangúe na nüxü nacuaxgüxüçax na nhuxãcü tá na jîixü rü nhuxguacü tá na nangóxü ga guma Maxêxêruü ga Cristu. Rü Cristuãe i Üünexü ga jema orearü uruügüwa jemaxü, rü nüxü nüxü nacuaxêe ga na Cristu rü tá ngúxü jangexü rü tá najuxü rü jixcama rü wena tá na namaxüxü rü nhuxmachí dauxügüxü i naãnewa tá na naxüxü na guxüärü ãexgacü jîixüçax. ¹²Notürü Tupana rü jema

nuxcümáxügüxü ga orearü uruügüxü nüxü nacuaxêe na táxüxütáma nümágu nüxü nadaugüxü ga guma Maxêxêruü ga naxçax nadaugücü, notürü pema tá jîixü na nüxü pedaugüxü. Rü düçax, Pa Chaueneægüx, gumatama Maxêxêruüchiga nixí ga perü orearü uruügü pemaã nüxü ixugügüxü ga jexguma Tupanaãe i Üünexü ga dauxüwa ne muxü jadexagüxêegu. Rü guxüma i ngêma ore i jima Maxêxêruüchiga, rü woo Tupanaärü orearü ngeruügü i dauxüçüãx rü nüxü nangúchaügü na jexeraãcü nüxü nacuaxgüxü.

**Tupana rü taxçax naca na
napexewa naxüünexüçax
i tóru maxü**

¹³Rü nhuxma na Cristuarü duüxügü peixügüxü, rü penaxwaxe na pexuãægüxü rü ípememarexü na penaxüxü i norü ngúchaü. Rü name nixí i aixcuma meã ípenanguxêe i guxüma i ngêma mexügü i Tupana tá pexna äxü i ngêxguma Ngechuchu ja Cristu núma üxgu. ¹⁴Rü nhuxma na Tupanaxãcügü peixügüxü, rü penaxwaxe na aixcuma naga pexínüxü. Rü tama name i nagu pexí ga jema nuxcümáxüxü ga perü ngúchaü ga üpa nagu pexüxü ga jexguma taüta Tupanaxü pecuaxgu. ¹⁵Notürü penaxwaxe i aixcuma meã pemaxê na Tupanapexewa naxüünexüçax i perü maxü. Erü nüma ja Tupana ja pexü idexechicü, rü naxüüne. ¹⁶Rü norü ore i úmatüxüwa rü nhanagürü:

“Chanaxwaxe i chauxrüü peixüüne,
erü chama rü chaxüüne”,

nhanagürü. ¹⁷Rü pema na “Pa Tonatix” nhapegüxü nüxü ja Tupana, rü nhuxma na nhama i nañewa pemaxëxü rü name nixi i guxüguma nüxü pemuüë. Erü nüma rü aixcumaxüchi nanangugü i wüxichigü i duüxügüarü maxü na nhuxäcü jixü. Rü tüxü napocu ja guxäma ja texé ja chixexü ügüxe, rü nüétama nixi ega woo texé tixügu, erü napexewa rü nawüxigumare i guxüma i duüxügü. ¹⁸⁻¹⁹Rü Tupana rü marü pexü íngangüxëë nawa ga jema nuxcümaxüxü ga perü maxü ga taxuwama mexü ga perü oxigüxütawa pejaxuxü. Rü jema na nawa pexü íngangüxëëxüçax rü pexna naxäxüçax i maxü i ngexwacaxüxü, rü poraäcü nüxü naxätanü. Jerü tama uiru rü exna díeru i ngauxwaxexümaã nanaxütanü, notürü Cristugü ja mexëchicümaã nixi ga naxütanüaxü. Jerü nüma ga Cristu rü nhama wüxi i carneru i taxuwama nanhuxraüxü i Tupanaçax imáxürü pexçax naju na pexü naxütanüxüçax. ²⁰Rü nüma ga Tupana rü woetama nuxcümaxüchima taüta naãne ixügügu, rü marü Cristuxü naxuneta na pexçax najuxüçax. Notürü nhamaücüü nixi ga nangóxü ga guma Cristu na pexü nangüxëëxüçax. ²¹Rü nhuxma rü Cristugagu nixi i nüxü pejaxögüxü ja Tupana ga juwa Cristuxü írudaxëcü rü dauxüwa nagacü. Rü ngëmacax nixi i nhuxma i Tupanaaxü pejaxögüxü rü ípenanguxëëgüxü na dauxüwa pexü nagagüxüçax. ²²Rü nhuxma na naga pexinüëxü i Tupanaärü ore i aixcuma ixixü rü pexü natauxcha na pegü pengechaügüxü erü Tupana rü marü pexü inajanaxoxëë i perü chixexügü. Rü

ngëmacax penaxwaxe i aixcuma guxü i perü ngüchaümaã pegü pengechaügü. ²³Rü nhuxma i pema rü marü penajauxgü i ngexwacaxüxü i perü maxü. Rü ngëmacax nhama ngexwacax pebuexürüü peixügü. Notürü ngëma maxü rü tama penatü rü pee ja juewaxëxewa nixi i penajauxü. Notürü Tupanaärü ore i maxüxü i taguma ijarüxoxüwa nixi i penajauxü. ²⁴Erü Tupanaärü ore i ümatüxüwa rü nhanagürü:

“Guxüma i duüxügü rü nhama wüxi i natüanerüümare nixi. Rü guxüma i norü mexü, rü wüxi i nanetüchacurüümare nixi. Rü ngëma natüane rü naju, rü nachacu rü narüngu. Rü ngëxgumarüü ta nixi i duüxügü na tama nataixü i norü maxü i nhama i nañewa. ²⁵Notürü törü Coriarü ore rü taguma inajarüxo”,

nhanagürü i Tupanaärü orewa. Rü ngëma Tupanaärü ore i mexü nixi ga pemaã nüxü jagugüxü.

2 ¹Rü ngëmacax name nixi i nüxü perüxoe i guxüma i chixexügü, rü ngëma na peidoratäxgüxü, rü ngëma na togüpexewa meã na pemaxënetaxü rü ngëma na peiauxächiwaxegüxü, rü ngëma na pexoregütäxgüxü. ²⁻³Rü ngëxguma chi aixcuma nüxü peicuaxächitanügu na nhuxäcü namecümaxüchixü ja törü Cori, rü nhama wüxi i öxchana i ngexwacax buxü i naëgünenixü nüxü ngüchaüxürüü penaxwaxe i poraäcü pexü nangüchaü i norü ore na ngëmawa peporaexüçax rü meã pejaexüçax i perü öwa na

ngẽmaãcü guxũwama namexũçax i perü maxũ i taguma gúxũ.

Cristu nixĩ ja nuta ja maxũcü

⁴Rü nhuxma rü name nixĩ i tóru Corina pengaicamagü. Erü nüma ja tóru Cori nixĩ ja jima nuta ja maxũcü ja Tupana najaxücü na namaã inaxügüãxũçax ja napata. Rü woo duũxũgü rü nüxũ na oexũ, notürü jima nixĩ ja Tupana najaxücü erü naxçax rü namexẽchi. ⁵Rü ngẽxgumarũü ta i pemax, rü Tupana pexũ nade na napataarü nutagü ja maxẽcü peixĩgüxũçax. Rü pema nixĩ i Tupanaãrü ngũxẽeruũgü i üünexũ i Ngechuchu ja Cristuégagu Tupanana ãmare pexãgüxũ. Rü ngẽma ãmare i nüxna pexãgüxũ i namaã nataãẽxũ nixĩ i perü maxũ i mexũ i napexewa. ⁶Rü Tupana rü norü ore i ümatüxũwa rü Cristuchigaxũ nixu rü nhanagürü:

“Nhuxma na ichanaxügüxũ ja chapata, rü jima nuta ja nüxĩra chajaxücuchicü, rü jima nixĩ ja nuta ja mexẽchicü ja chamatama chanajaxücü na chapata namaã ichaxügüxũçax. Rü jima nuta rü chaunchiga nixĩ. Rü jíxema nüxũ jaxõxẽ, rü aixcuma tá tanajaxu i ngẽma maxũ i taguma gúxũ i tümamaã ichaxunetaxũ”,

nhanagürü. ⁷Rü pema na nüxũ pejaxögüxũ, rü Cristu rü pexçax rü guxũwama name rü naporaxũchi. Notürü ngẽma tama jaxögüxũçax, rü taxuwama name. Rü ngẽmacax ja Tupana rü norü ore i ümatüxũwa rü nhanagürü:

“Jima nuta ja ĩpataarü üruũgü nüxũ ocü, rü chauxçax rü gucü ja nutaarü jexera namexẽchi. Rü ngẽmacax jimaétiwa nixĩ ichanaxügüxũ ja chapata”, nhanagürü. ⁸Rü Tupanaãrü ore rü nhanagürü ta:

“Guxũma i ngẽma tama jaxögüxũ rü tama irixĩnũẽchaũxũ rü jima nutagu tá najarüpucutüü”, nhanagürü. Rü ngẽmaãcü i guxũma i ngẽma tama jaxögüxũ rü tá chixexügu naji erü tama Tupanaga naxĩnũẽchaũ rü tama Cristuaxũ najaxögüchaũ. Rü ngẽmacax Tupana tá nanapocue jema nüma nüxũ jaxuxürüü. ⁹Notürü pema nixĩ i duũxũgü i tóru ãxçagacü ja Tupana pexũ idexechixũ na norü ngũxẽeruũgü peixĩgüxũçax. Rü pema nixĩ i duũxũgü i napexewa ixüünexũ erü nümatama ja Tupana rü norü duũxũgüxũ pexũ nixĩgüxẽẽ na nüxũ peixuxũçax i norü ore i aixcuma mexẽchixũ. Rü nümatama ja Tupana nixĩ ga chixexũwa pexũ ĩnanguxũxẽxũ na norü ngóonexũ i mexẽchixũgu pechocuxũçax. ¹⁰Rü ũpa ga pema rü tama Tupanaãrü duũxũgü peixĩgü, notürü i nhuxma rü aixcuma norü duũxũgü peixĩgü. Rü ũpa rü taxúeaxũma pengechaũtümüũgü, notürü i nhuxma rü Tupanaãxũ pengechaũtümüũgü.

Nhuxma na Tupanaãrü duũxũgü peixĩgüxũ, rü name nixĩ i meã naxçax pemaxẽ

¹¹Pa Chaueneẽgü ja Pexũ Changechaũgüxex, rü nhuxma na Tupanaãrü duũxũgü peixĩgüxũ, rü tama nhama i naãneçũãx peixĩgü. Rü

ngẽmacax pexũ chacaaxũ na nüxũ perüxoexũcax i guxũma i ngẽma ngũchaũgũ i chixexũ i nhama i naãnecũãx naga ìxũ. Erü ngẽma ngũchaũgũ i chixexũ rü taãexũ chixexũgu nanguxẽechaũ. ¹²Rü name nixĩ i meã pemaxẽ napexewa i ngẽma duũxũgũ i tama Tupanaxũ cuaxgũxũ. Rü ngẽxguma woo poraãcü chixri pechiga jadexagũgu i nümagũ, rü tá nüxũ nadaugũ na nhuxãcü mexũ pexũgũxũ, rü tá Tupanaxũ nicuaxũũgũ i ngẽxguma Cristu wena núma ùxgu. ¹³Rü name nixĩ na tórü Cori ja Ngechuchugagu tũmaga pexĩnũexũ ja guxãma ja jixema perü ãẽxgacũgũ ixĩgũxe. Rü ngẽmaãcü name nixĩ i meã naga pexĩnũẽ ja ãẽxgacũ ja tacü ja Romawa ngẽxmacü, erü nüma nixĩ i guxũ i togũ i ãẽxgacũgũétüwa nangẽxmaxũ. ¹⁴Rü ngẽxgumarũũ ta name nixĩ i naga pexĩnũẽ i ngẽma togũ i ãẽxgacũgũ i petanüwa namugũxũ ja jima ãẽxgacũ ja tacü na napocueãxũcax i ngẽma chixexũ ügũxũ rü namaã nataãẽgũxũcax i ngẽma mexũ ügũxũ. ¹⁵Erü Tupana nanaxwaxẽ na mexũ pexũgũxũ na ngẽmaãcü ipejanangeaxgũxẽexũcax i ngẽma duũxũgũ i tama Tupanaãrü orexũ cuãxchaũgũxũ rü chixri ngẽma orechiga idexagũxũ. ¹⁶Rü nhuxma na Cristu pexũ ñgũxũxẽexũ, rü name nixĩ i duũxũgũ i aixcuma ñgũxũxũrüũãcü meã pemaxẽ. Notürü nhuxma na ñpengũxũxũ rü tama name na ngẽmamaã pegũ ñpepoxũxũ na tacü rü chixexũ pexũgũxũcax. Erü nhuxma na Tupanaãrü duũxũgũ peixĩgũxũ, rü name nixĩ i norü ngũchaũxĩcatama pexũgũ. ¹⁷Rü name nixĩ i meã penajauxgũ i guxũma i

duũxũgũ. ¡Rü nüxũ pengechaũ i taeneẽgũ i jaxõgũxũ! ¡Rü nüxũ pemuũẽ ja Tupana! ¡Rü naga pexĩnũẽ ja ãẽxgacũ ja tacü ja Dumacũãx!

Tanaxwaxẽ i Cristurũũ jaxna namaã taxĩnũẽ i ngẽxguma ngũxũ ingegũgu

¹⁸Pa Duũxũgũ i Coriãxgũxũx, ¡rü nüxũ pengechaũgũ rü naga pexĩnũẽ i perü corigü! Rü tama name i ngẽma perü corigü i pemaã mecũmaxũxĩxĩcatama pengechaũgũ, notürü name nixĩ i nüxũ pengechaũgũ ta i ngẽma perü corigü i chixecũmaxũ. ¹⁹Erü Tupana rü pemaã nataãẽ ega nüxũ na pengechaũgũxũcax jaxna namaã pexĩnũẽgu i ngẽxguma texẽ notũcaxmamare chixexũ pemaã ùxgu rü ngũxũ pexũ tingexẽẽgu. ²⁰Notürü çtacüwa pexũ namexũ ega jaxna namaã pexĩnũẽgu i ngẽxguma wüxi i perü chixexũcax pepocuegu? Notürü ngẽxguma tacü rü mexũ i pexũxũgũgu ngũxũ peingegũgu rü jaxna namaã pexĩnũẽgu, rü ngẽma waxi nixĩ i Tupanapexewa mexũ. ²¹Rü ngẽma na mexũ pexũxũgũgu ngũxũ peingegũxũcax nixĩ i Tupana pexũ idexechixũ. Jerü ga Cristu rü ta pexcax ngũxũ ninge. Rü jemaãcü pexũ nüxũ nadauxẽẽ na nhuxãcü nüma nanaxwaxexũ na naxrüũ jaxna namaã pexĩnũẽxũ i ngẽma ngũxũ. ²²Nüma ga Cristu rü taguma pecadu naxü, rü taguma texexũ nawomũxẽẽ. ²³Rü jexguma duũxũgũ chixexũ namaã ixugũegu, rü nüma rü taxuũma ga chixexũmaã nanangãxũ. Rü jexguma ngũxũ nüxũ jangexẽẽgũgu, rü nüma rü tama tacü rü chixexũmaã nanaxãũxũne. Notürü Tupanamaã nüxũ nixu na nüma

namaã namexêẽãxũçax ga jema duũxũgũ ga chixri namaã chopetũxũ. Jerũ nüxũ nacuax rü Tupana rü aixcuma meã nanangugũ i guxũma i duũxũgũarũ maxũ. ²⁴Rü nümatama ga Cristu rü nügũxũnegu najange ga tórũ pecadugũ ga jexguma curuchagu najuxgu. Rü jemaãcü nanaxũ na nüxũ rüxoexũçax i tórũ chixexũ na naxçaxicatama imaxêxũçax. Nüma rü pexçax nanapix na jemaãcü pexũ nameẽxêxũçax. ²⁵Rü pema ga ũpa rü nhama carnerugũ i nu ne naxĩmarexũrũ peixĩgũ. Notürũ i nhuxma rü marũ Cristuçax pewoegu. Rü nüma nixĩ i perũ darũ jĩxũ, rü nüma nixĩ i pexna nadauxũ.

Nhuxãcü Tupana nanaxwaxe na namaxêxũ i ngẽma ixãmaxũ rü ixãtexũ

3 ¹⁻²Rü pemax, Pa Ngexũgũx, rü name nixĩ i petega pexĩnũe na ngẽma pete i tama jaxõxũ nüxũ dauxũçax i perũ maxũ i mexũ i Tupanapexewa rü duũxũgũpexewa rü ngẽmacax na jaxõõxũçax woo taxuũma i Tupanaãrũ orexũ namaã peixugu. ³Rü ngẽma na aixcuma pemexũçax, rü tama name i nagu perũxĩnũe na nhuxãcü pegũ pemexêẽjaexũchixũ, rü exna uirunaxçax i ngaxãerũmaã pengaxãegũxũ, rü exna tatanũxũchixũ i naxchirugu na peicuxgũxũ. ⁴Notürũ name nixĩ i perũ maxũwa pegũ pemexêegũ rü guxũma i duũxũgũmaã pemecũmagũ rü taguma texémaã penuãegũ, erũ ngẽma nixĩ i perũ mexũ i taguma ijarũoxõ i aixcuma mexũ i Tupanapexewa. ⁵Rü jemaãcü norũ maxũ

i mexũmaã nixĩ ga nügũ jangaxãegũxũ ga jema nuxcũmaxũgũxũ ga ngexũgũ ga Tupanapexewa ixũnũexũ. Rü nümagũ rü Tupanaãxũ najaxõgũ rü natega naxĩnũe. ⁶Rü jemaãcü ta ijixĩ ga Chara ga ngĩte ga Abrãũga na naxĩnũxũ, rü ngĩrũ corimaã naxuaxũ. Rü pemagũ rü tá ta ngĩrũ peixĩgũ ega mexũ pexũgũgu. Rü nhuxmachi taxuũçaxtãma tũxcũũ peteçax pemuũe. ⁷Rü ngẽxgumarũũ ta i pemax, Pa Jatũgũx, rü name nixĩ i meã pemaãxũ pengechaũgũ rü aixcuma jaxna ngĩmaã pexĩnũe, erũ ngĩma rü irũturaãe. Rü name nixĩ i ngĩmaã petaãegũ erũ Tupana rü pexna naxããxũrũũ ngĩxna nanaxã i ngẽma maxũ i taguma gũxũ. Rü name nixĩ i ngẽmaãcü meã ngĩmaã pemaxẽ na Tupana nüxũ ãnũxũçax i perũ jumuxegũ.

Jĩxema mexũ ũgũxe ja ngũxũ ingegũxechiga

⁸Rü ngẽmaãcü chanaxwaxe i guxãma i pema rü pegũxũ pengechaũtũmũũgũ rü wũxigu perũxĩnũe, rü aixcuma nüxũ pengechaũgũ i guxũma i taeneegũ i jaxõgũxũ. Rü chanaxwaxe i aixcuma pemecũmagũ rü guxãmaã pegũ pewũxiguxêe. ⁹Rü ngẽxguma texe chixexũ pemaã ũxgu, rü tama name i pema rü ta chixexũ tũmamaã pexũ. Rü ngẽxguma texe pemaã guxchigagu, rü tama name i pema rü ta tũmamaã peguxchiga. Notürũ narũmemaã nixĩ i mexũ i oremaã tũxũ pengãxũga rü tũxũ perũngũxêe, erũ Tupana pexũ nidexechi na pexũ nangũxêẽxũçax. ¹⁰Erũ Tupanaãrũ ore i ũmatũxũwa rü nhanagürũ:

“Ngëxguma texé taãëãcúma
 maxchaũgu, rü name nixí i
 nüxna tadau ja túmaãrú contú
 na tama chixexũ i oremaã
 jadeaxũcax. Rü ngëxgumariũ
 ta name nixí i nüxna tadau i
 túmaãx na tama doraxũ
 jaxuxũcax. ¹¹Rü name nixí i
 nüxna tajaxũ i guxũma i
 chixexũgü, rü mexũ taxü. Rü
 ngëxgumarüũ ta name nixí i
 guxũguma naxcax tadau na
 togúmaã tataãëxũ. ¹²Erü tórü
 Cori rü tuxna nadau ja jíxema
 aixcuma ímexê, rü nüxũ naxĩnũ
 i túmaãrú jumuxê. Notürü
 tümamaã nanu ja jíxema
 chixexũ üguxe”,

nhanagürü i ngêma Tupanaãrú orewa.
¹³¿Rü texé tá chixexũ pemaã üxũ ega
 pema rü aixcuma guxũguma mexũ
 pexügügu? ¹⁴Notürü ngëxguma chi
 ngêma mexũ na pexügüxũcax ngúxũ
 peingegügu, rü name nixí i petaãëgü.
 ¿Rü taxuũcaxma texéxũ pemuũê, rü
 taxuũcaxma tacúcax pexoegaãëgü! ¹⁵Rü
 name nixí i perü Corixũ pejaxixêê ja
 Cristu rü aixcuma naga pexĩnũê, rü
 guxũguma ípememare na meã
 penangãxũxũcax i guxũma i duũxũgü i
 pexna caxũ na tũxücü Cristuaxũ
 pejaxögüxũ. ¹⁶Notürü name nixí i nüxũ
 pengechaũãcúma penangãxũ rü tama
 pegügu perüxĩnũëãcúma na norü jexera
 peixügüxũ. Rü name nixí i meã pemaxê
 na taxuũcaxma pexoegaãëxũcax. Rü
 ngëxguma ngêmaãcü pemaxëgu rü tá
 naxãneê i ngêma duũxũgü i chixri
 pechiga idexagüxũ na nhuxãcü
 Cristucax pemaxëxũ. ¹⁷Jixema rü ngúxũ

tingegü ega chixexũ ixügügu. Notürü
 narümemãê nixí na mexũ ixügüxũcax
 ngúxũ na ingegüxũ, ega ngêmaãcü
 Tupana naxwaxegu. ¹⁸Jerü nümatama
 ga Cristu rü ngúxũ ninge, rü
 wüxicanatama guxããrú pecaducax naju.
 Rü woo na mecü jíixũ rü taxcax naju i
 jixema i chixexũ i duũxũgü ixügüxũ. Rü
 jemaãcü nanaxü na Tupanaxütawa tũxũ
 nagagüxũcax. Rü woo naju ga naxũne,
 notürü ga naãê rü tama naju. ¹⁹Rü
 jexguma naxũne juxgu rü naãê rü
 natanüwa naxü ga jema naãëgü ga
 Tupana pocuexũ, rü orexũ namaã
 najarüxu. ²⁰Rü jema naãëgü ga jexma
 pocuexũ, rü jema nixí ga naãëgü ga
 jema duũxũgü ga Noé maxũgu tama
 Tupanaga ínüëxũ woo jaxna namaã
 naxĩnũ ga jexguma Noé naxüjane ga
 guma wapuru. Rü 8 ga
 duũxũgüxicatama nixí ga guma
 wapurugu ichoũxũ, rü jema nixí ga
 guma mucü ga taxüchicüarü dexáétüwa
 maxëxũ. ²¹Rü jema dexá rü wüxi ga
 cuaxruũ nixí. Erü ngëxguma dexáwa
 íbaiegu, rü duũxũgüxũ nüxũ tacuaxëê
 na Ngechuchu ja Cristu wena
 maxũxũgagu jíixũ i tũxũ nangëxmaxũ i
 maxũ i taguma gúxũ. Rü tama
 taxüneãrú düxétüwa na imexũcax nixí i
 íbaiexũ, notürü ítaiaie jerü marü
 Tupanana naxcax taca na tũxũ
 ijanaxoxëãxũcax ga tórü pecadugü na
 aixcuma napexewa imexũcax rü
 aixcuma mexũgu rüxĩnũëxũcax. ²²Rü
 nüma ga Ngechuchu ja Cristu, rü
 dauxũgüxũ i naãnewa naxü, rü nhuxma
 rü Tupanaãrú tügüneciwawa
 nangëxma. Rü nhuxma rü namëxwa
 nangëxmagü i guxũma i Tupanaãrú

orearü ngeruũgü i dauxũcũãx rü
guxũma i ãẽxgacügü i dauxũcũãx.

**Tanaxwaxe i ngẽma cuax i Tupana
tüxna ãxũmaã nüxũ tarüngũxẽẽ i
taeneẽgü**

4 ¹⁻²Rü ngẽmacax name nixĩ na
ípememarexũ na ngúxũ peingegũxũ
jexgumarũũ ga Cristu na ngúxũ jangexũ.
Erü jíxema ngúxũ ingexe rü marü nüxũ
tarüxo i tümaãrü pecadu na guxũguma
meã Tupana naxwaxexũãcũma
tamaxũxũcax, rü tama i tümaxũne
naxwaxexũãcũma na tamaxũxũcax.
³Ûpa ga pemax, rü mucũma ga taunecü
penaxüecha i ngẽma chixexũ i nhuxma i
ngẽma duũxũgü i tama Tupanaxũ
cuaxgũxũ ügũxũ. Rü jexguma ga pema
rü pecadu pexüguãcũma pemaxẽ, rü
penaxü ga pexeneãrũ ngúchaũ, rü
pengãxẽ, rü peta ga nawa
pexãügatanũxũ pexügu, rü tacü i
nguchiãxgũxũ poraãcü peixaxcugü, rü
tupananetachicünaxãgũxũ peicuaxũũgü
i woo Tupana na pexna nachuxuxũ i
ngẽma. ⁴Rü jema duũxũgü ga namaã
pexãmücügũxũ ga jexguma chixri
pemaxẽgu, rü nhuxma rü poraãcü nagu
narüxinũẽ na tacücax tama natanügu
pexãgũxũ rü tama nawe perüxĩxũ i
ngẽxguma norü chixexũ naxügu. Rü
ngẽmacax nixĩ i nhuxma i chixri
pechiga jadexagũxũ. ⁵Notürü nümagü
rü tá ta Cristupexewa nangugü na
namaã nüxũ jaxugũxũcax na nhuxãcü
namaxẽxũ. Rü nüma ja Cristu rü
ínamemare na nüxna jacachigũxũcax i
guxũma i duũxũgü i maxẽxũ rü juexũ.
⁶Rü ngẽmacax ja Tupana rü naxũpa na
najuexũ i duũxũgü rü marü nüxna

nanaxuaxũ i maxũ i taguma gúxũ. Erü
nanaxwaxe na naxrüũ guxũguma
mexũwa namaxẽẽchaxũ ega woo nhama
i naãnewa najuegu i naxũnegü. ⁷Rü
marü ningaica na nagúxũ i nhama i
naãne rü guxũma i tacü i nawa
ngẽxmaxũ. Rü ngẽmacax name nixĩ na
ípexuãẽxũ rü meã peãẽ ta ipexügũxũ rü
guxũguma pejumuxẽgũxũ. ⁸Rü guxũãrũ
jexera i ngẽma pexũ chanaxwaxexũ nixĩ
na aixcuma pegü pengechaũgũxũ i
wüxichigü. Erü ngẽxguma aixcuma jigü
ingechaũgũgu rü ngẽmaãcü inajarüxo i
muxũma i pecadugü. ⁹Rü meã pegü
pejauxgü i wüxichigü i pechiũwa! Rü
tama name i tümamaã penuãẽãcũma
tüxũ pejaxu. ¹⁰Rü wüxichigü i pemax,
rü Tupana pexna nanaxã i perü cuax.
Rü ngẽma perü cuaxmaã rü name nixĩ i
wüxichigü pegü perüngũxẽẽgü, na
aixcuma Tupanaãrũ ngũxẽẽruũ i mexũ
na peixügũxũcax rü meã namaã
pepuracüexũcax i guxũma i ngẽma cuax
i Tupana pexna ãxũ. ¹¹Rü ngẽxguma
texé nüxũ ixuxgu i ore, rü name nixĩ i
aixcuma Tupanaãrũ orexũ tixu. Rü
ngẽxguma texé togũxũ rüngũxẽẽgu, rü
name nixĩ i Tupana tüxna ãxũ i
poramaã tanaxü. Rü guxũma i ngẽma
pexũxũ rü name nixĩ i meãma penaxü
na ngẽmaãcü Ngechuchu ja Cristugagu
Tupanaxũ peicuaxũũgũxũcax. Erü nüma
ja Tupana rü guxũguma namexẽchi rü
naporaxũchi. Rü ngẽmaãcü jĩxũ.

**Ngẽxguma Cristuaxũ jaxõxgu rü
ngúxũ tinge**

¹²Pa Chaueneẽgü ja Pexũ
Changechaũgũxex, nhuxma na taxũ i
guxchaxũgü i perü nguxẽẽruũ pexcax

inguxũ, ĩrũ tãũ i pebaixãchiãẽgũxũ, nhama ĩacũ i taguma nũxũ pedauxũ ngupetũũrũũ! ¹³Notürũ narũmemaẽ nixĩ i petaãẽgũama, erũ jema Cristu ngũxũ na ingexũrũũ nixĩ i ngũxũ na peingexũ i nhũxmax na petaãẽgũxũcax i ngẽxguma wena núma naxũxgu i nũmax. ¹⁴Rũ ngẽxguma Cristuaxũ na pejaxõgũxũgagu texé pemaã guxchigagu, rũ wũxi i perũ taãẽ nixĩ i ngẽma. Erũ ngẽmaãcũ nũxũ pecuax na Tupanaãe i Üünexũ rũ pewa na nangẽxmaxũ. ¹⁵Rũ ngẽxguma chi ngũxũ peingegũgu, rũ name nixĩ na wũxi i mexũ na pexũgũxũgagu na ĩĩxũ rũ tama wũxi i chixexũgagu na ĩĩxũ, ngẽxgumarũũ i máeta rũ exna ngítaax rũ exna togũarũ guxchaxũwa na pegũ pengẽxmagũxẽẽxũ. ¹⁶Notürũ ngẽxguma texé Cristuaxũ tajaxõxũgagu ngũxũ tingexgu, rũ taxuũcaxma tũxcũũ ngẽmacax taxãne. Notürũ tanaxwaxe i ngẽmacax Tupanaxũ tucuaxũũ. ¹⁷Rũ nhũxma rũ marũ nawa nangu na Tupana ngũxũ tũxũ ingexẽẽxũ na ngẽmaãcũ tũxũ ĩjanawexãchixẽẽxũcax i ĩjixema na naxãcũgũ ĩxĩgũxũ. Rũ ngẽxguma ngẽmaãcũ tamaã ĩnaxũgũãgu, rũ ĩnhuxãcũ tá nũxũ naxũpetũ i ngẽma duũxũgũ i tama Tupanaãrũ ore i mexũga ĩnũẽchaũũ? ¹⁸Erũ Tupanaãrũ ore i ũmatũxũwa rũ nhanagürũ:

“Ngẽma duũxũgũ i mexũ ũgũxũ rũ guxchaãcũma nanajauxgũ i maxũ i taguma gũxũ. Rũ nhũxma na ngẽmaãcũ ĩĩxũ, ĩrũ nhuxãcũ tá nũxũ nangupetũxũ i ngẽma duũxũgũ i chixexũ ũgũxũ rũ pecaduãxgũxũ?”

nhanagürũ. ¹⁹Rũ ngẽmacax ja ĩjixema Tupana naxwaxexũãcũma ngũxũ ingegũxe, rũ name nixĩ na mexũ taxũgũiechaxũ rũ Tupana ja tũxũ ũcũmexẽgu na tanaxũxũ i tũmaãe na nũxna tũxũ nadauxũcax. Erũ nũma ja Tupana rũ mecũ nixĩ rũ taguma texẽxũ nawomũxẽẽ.

Ucũxẽgũ naxcax i ngẽma jaxõgũxũ

5 ¹Rũ nhũxmax, Pa Jaxõgũxũãrũ ãẽxgacũgũx, rũ pexna chanaxãxchaũ i wũxi i ucũxẽ i mexũ, erũ chama rũ ta pexrũũ jaxõgũxũãrũ ãẽxgacũ chixĩ. Rũ chamaxũchima nixĩ ga nũxũ chadauxũ ga nhuxãcũ ngũxũ na jangexũ ga Cristu. Rũ chama rũ tá ta pexrũũ choxũ nangẽxma i chauchica i mexũ i ngẽxguma wena núma naxũxgu. ²Rũ nhũxma chanaxwaxe i nũxna pedau rũ nũxũ perũngũxẽẽe i guxũma i Tupanaãrũ duũxũgũ i pemexwa ngẽxmagũxũ. Rũ chanaxwaxe i mexũ i perũ ngũchaũmaã Tupana naxwaxexũãcũma penaxũ i ngẽma puracũ, rũ tama texé pexũ muxguxica penaxũ rũ exna dũẽruçax penaxũ. ³Rũ tama chanaxwaxe i namaã penuẽãcũma rũ penangaãcũma penamu i ngẽma duũxũgũ. Notürũ chanaxwaxe i mexũ i perũ maxũmaã nũxũ nũxũ pedauxẽẽe na nhuxãcũ Tupana naxwaxexũ na namaxẽxũ. ⁴Rũ ngẽxguma wena núma naxũxgu ja tórũ Daruũxũchi ja Cristu, rũ pema rũ tá penajauxgũ i wũxi i perũ ãmare i ngaxcuerũũ i mexẽchixũ i taguma ngauxũ. ⁵Rũ ngẽxgumarũũ ta i pemax, Pa Ngextũxũcũgũx, rũ name nixĩ i naga pexĩnũe i ngẽma perũ ãẽxgacũgũ i Tupanaãrũ puraciwa

puraciexũ. Rũ guxãma i pema i jaxõgũxũ, rũ name nixĩ i wũxichigũ pegũ perũngũxẽ rũ taguma pegũgu perũxĩnũ na pemũcũgũarũ jexera peixĩgũxũ. Erũ Tupanaãrũ ore i ũmatũxũwa rũ nhanagũrũ:

“Tupana rũ tama norũ me nixĩ i ngẽma duũxũgũ i nũgũ írũtaxũ. Notũrũ Tupana nũxũ narũngũxẽ rũ namaã namecũma i ngẽma duũxũgũ i nũgũ írũxĩragũxũ”,

nhanagũrũ i ngẽma orewa. ⁶Rũ ngẽmacax name nixĩ i pegũ íperũxĩragũ rũ Tupanamexẽ ja poranewa pegũ pengẽxmagũxẽ na nũma pexũ nataxẽexũcax i ngẽxguma nawa nanguxgu na ngẽmaãcũ pemaã naxũãxũ. ⁷Rũ name nixĩ i Tupanamexẽgu penaxũ i guxũma i perũ oegaãẽgũ, erũ nũma ja Tupana rũ guxũguma pegu narũxĩnũ rũ aixcuma pexna nadau. ⁸Rũ name nixĩ i guxũguma pegũna pedaugũ rũ ípexuãẽgũ, erũ perũ uwanũ i Chataná rũ dama wũxi ja ai ja taijaxũchicũrũũ nananhaãne rũ tũmacax nadau na texéxũ tá nachixexẽxũ. ⁹Rũ peporaeamax rũ pejaxõgũamãx i ngẽxguma tacũ rũ chixexũ pemaã naxũxchaũgu! Erũ nũxũ pecuax rũ guxũma i taeneẽgũ i guxũwama ngẽxmagũxũ rũ pexrũũ ngẽmatama ngũxũ ningegũ. ¹⁰Notũrũ ngẽxguma paxaxãchi nhama i naãnewa ngũxũ peingegũguwena, rũ Tupana rũ tá pexũ nimexẽ na aixcuma napexewa pemexũcax, rũ tá pexũ narũngũxẽ na

taguma nũxũ perũxoexũcax, rũ tá pexũ naporaexẽ na aixcuma perũ maxũwa peporaexũcax. Rũ daatama Tupana nixĩ ja tũxna naxãcũ i guxũma i mexũ i tũxũ ngẽxmaxũ, rũ tũxũ idexechicũ na naxũtawã tũxũ nangẽxmaxũcax i tachica i mexũ i taguma gũxũ, erũ Ngechuchu ja Cristuarũ duũxũgũ tixĩgũ. ¹¹Rũ name nixĩ i guxũguma nũxũ ticuaxũũgũ ja Tupana, erũ nũma nixĩ i guxũãrũ ãẽxgacũ jĩixũ i guxũguma. Rũ ngẽmaãcũ jĩixũ.

Pedru rũ jema jaxõgũxũ narũmoxẽ

¹²Taeneẽ ja Siuwãnu ja meã jaxõcũmaã petanũwa chanamu i nhaã nuxmarexũ i popera na pexũ chixucuxẽgũxũcax rũ pemaã nũxũ chixuxũcax na ngẽma pexũ nangechaũxũgagu jĩixũ ja Tupana i aixcuma pexũ nangũxẽxũ. Rũ nhuxma na ngẽmaãcũ pexũ nangechaũxũ, rũ name nixĩ i guxũguma naxcax pemaxẽ. ¹³Rũ pexũ narũmoxẽgũ i guxũma i taeneẽgũ i jaxõgũxũ i pexrũũ Tupana idexechixũ i núma Romawa ngẽxmagũxũ. Rũ ngẽxgumarũũ ta pexũ narũmoxẽ i chorũ ngũxẽerũũ i Marcu ja chaunerũũ íxĩcũ. ¹⁴Rũ chanaxwãxe i wũxichigũ i pema rũ pegũ pengechaũgũãcũma pegũ perũmoxẽgũ. Rũ ngẽxgumarũũ ta chanaxwãxe na aixcuma petaãẽgũxũ i guxãma i pema na Ngechuchu ja Cristuarũ duũxũgũ peixĩgũxũ. Rũ ngẽmaãcũ jĩixũ.

*Rũ nuãma pexna,
Pedru*